

dinsiya

peniya ku kerabi. emitrl ku kanku dinsiya na daleken. peniya ku i, tu  
auaway ku kane muli na mainayan na matengadra i baybay.

“masime yu kanu dinsiya! alamu! katengadraw kadri.” kema  
aw benabati lla dra, a makiteng yu driya i, tremima dra makiteng dra dinsiya  
i temama. tutuluwa tu mutralatralaw. kalleayan yu malinalinay kadri ruma i  
sabak. marekamatrina yu aw tu trimaanay yu dra paruasatr dra dinsiya.  
amawna, druwaya tu mutralatralaw. an muisatr yu i, adri yu mutratrereb.  
menau ku kanu dra kadru i babalu muliyuliyus. salaw yu semangal. likudran  
i, temakakesi yu lla kana kaw-cong. midinsiya yu muka i takesian. adrunu i,  
salaw ku milling kanu. pakiyanger ku draku kinamakitengan. an auka mi  
isuwa i, mudradrangi mi. unyan mi dra uwaisatran. an tu pakarunay mi dra  
maidraidrangan i, kabekas mi muka. likudran i, midinsiya mi lla. karuwa ta  
puisatr dra trau i nganguwayan aw i likudran. an mauka ta kitraluna,  
kiasepana i, matrina tu raretraan i likudran. karuwa ta puisatr dra sadru.  
driyama, tu pungaladay dra “unmpang” na dinsiya.

a temakakesi ku kana pallibak na takesian dra pukalluwatr ami i, kadru  
a saya wari. mikakipa muka i uma kikaruna i namalli kay nanalli. penauwa

dra muka purikana dra gung na baelli miyadruwa. menau ku kana dinsiya  
kadru i ruma aw ku uisatray. maraasatr kanku na dinsiya. adri ku karuwa  
maretigir muisatr. menau ku lla kanku risarisan dra muisatr dra dinsiya. tu  
lima na tarawiri i, tu dikesay na handur. tu lima na tarawallan i, tu  
arengatripaw tu katengadrawan kana dinsiya. tu dapall na tarawallan i, tu  
sununganay kana teluwa tu repuyungan emiwas. ku pakurenanganay draku  
ninauwan aw ku iwasaw na dinsiya i, muidraidraw ku aw ku suangaw a  
kawi. mabungu ku tranguru. a kakerabian i, minedang ku dra kinauwan  
kanku bungu aw mullasedr ku.

killengaw ku dra emauauaw i nanalli kanku. marekamudallep tu  
llengaw. kamawan dra malladram i nanalli dra mullasedr ku kana  
kiyaedrengan i makadare. “upatrran lla! kerabia ta!” kema. ku sabesabay  
ku lima aw mekan ku. menau kanku bungu i namalli i, adri marengay dra  
manay. ku babatiaw lla draku inuisatran kana dinsiya. “saigu yu lla? an  
malladu ta i, maragan ta aw ta asallaw driya meladaladam!” kema i namalli  
kanku. an muka ku kemiyangera i, salaw sadeku ku wanger! idri i, amau ku  
kinareadriyan abalu.” kema i muli na mainayan.

(文章大意 僅供參考) ※字數限 200 字

## 腳踏車

阿公想起小時候沒有交通工具，去幫長輩買東西或做事，都要跑步去，有了腳踏車，前、後面可載人，去割草、砍甘蔗，後載位置大，可以載很多東西，給腳踏車取名為「unmpang」搬運車。

小學五年級，爸媽去田裡工作，哥哥去牧牛，我看到腳踏車在家裡就騎出去，腳踏車比我高，沒辦法坐在椅墊上，我左手握住方向盤，右手臂夾住椅子，右腳穿過三角地方，開始騎腳踏車，搖晃間撞到一棵樹，頭上出了包，爸爸對我說：「跌倒了爬起來再練一次！」